

Akranesi 24. janúar 2021

Góðan dag!

Hef kynnt mér nýjustu útgáfu af frumvarpi til laga um breytingu á lögum um fjölmiðla, nr. 38/2011, 367. mál og sendi hér inn nokkrar vangaveltur mínar.

Líkt og síðast þegar ég veitti umsögn, fagna ég því að frumvarpið sé nú aftur komið í virka meðferð þingsins. Hins vegar getur þessi umsögn mín nú ekki orðið eins jákvæð og sú fyrri, því miður. Fyrir því eru ástæður.

Ljóst er að þær breytingar sem nú hafa verið gerðar á frumvarpinu, og snerta úthlutunarreglur styrkja til einkarekinna fjölmiðla, rýra töluvert hlut milli-lítilla fjölmiðla eins og Skessuhorns á Vesturlandi, Víkurfrétta á Reykjanesi, Austurfréttar á Austurlandi og annarra sambærilegra miðla t.d. í Eyjafirði, Skagafirði og víðar. Þessi fyrirtæki hafa hvert fyrir sig 3-8 starfsmenn, gefa út vikulega prentmiðla og gegna gríðarlega mikilvægu samfélagslegu hlutverki. Þau hafa öll þurft að takast á við versnandi umhverfi á fjölmiðlamarkaði, en einnig vegna þess hversu óþægilega háð þau eru duttlungum í viðskiptakjörum Íslandspósts ohf. Að því gefnu að framlag til málaflokksins verði ekki aukið úr 400 milljónum króna blasa nokkur atriði við:

Í fyrsta lagi er aukið vægi styrkja til þriggja stærstu fjölmiðlablokkanna sem fljótt á litið ná til sín um 70-75% stuðningsgreiðslnanna. Þá verður lítið eftir fyrir alla aðra, ekki síst þar sem búið er að taka út úr fyrri drögum að frumvarpi takmörk sem fjölmiðlar þurftu að uppfylla, svo sem um útgáfutíðni og samfélagslegt hlutverk, sem þýðir að fjölmargir ör-fjölmiðlar bætast í pottinn, fjölmiðlar sem jafnvel eru gefnir út sem áhugamál útefenda eða/og eru fagrit íþróttagreina og ættu því frekar að falla undir stuðning við íþróttafélög, en flokkast sem fjölmiðill. Sú viðbót mun rýra hlut þeirra fjölmiðla sem gegna breiðara hlutverki í samfélögum þeim sem þeir starfa í. Lauslega reiknað yrðu áhrif þessara breytinga fyrir Skessuhorn ehf. að hlutur míns fjölmiðils af heildarúthlutun færi úr tæplega 2% af heildarpottinum (miðað við Covid-19 stuðning til fjölmiðla sl. Sumar) og niður fyrir 1% (af 400 milljónum króna).

Ég lít því svo á að þær breytingar sem nú hafa verið gerðar á frumvarpinu, miðað við drög menntamálaráðherra, hafi ekki verið gerðar með hagsmuni útgefenda landshlutablaða í huga. Að framansögðu skora ég því á nefndina að ef þessar breytingar ná fram að ganga að tryggja a.m.k. 500 milljóna króna framlag til einkarekinna fjölmiðla, í stað 400 milljóna eins og nú er gert ráð fyrir.

Að endingu ítreka ég, að þrátt fyrir þessar athugasemdir við frumvarpið nú, er ég ekki mótfallinn því að það hljóti afgreiðslu úr nefnd og verði að lögum. Tel fyrir löngu tímabært að hægt verði að ljúka umræðu um fjölmiðlafrumvarp, en umræðan sem slík er farin að skaða stöðu okkar.

Ég lýsi mig reiðubúinn, ef þess verður óskað, að mæta til fundar við allsherjar- og menntamálanefnd og ræða þessi mál.

Virðingarfyllst,

---

**Magnús Magnússon, ritstjóri**

Skessuhorn – Fréttaveita Vesturlands